

inn der Communion durch den Mund des Dieners eben die selbigem wort / so er anfänglich zu seinen Jungern geredt hat / noch spreche / vnd nicht allein schlecht brot vnd wein / sondern sein Naturlichen leib vnd blut / allen denen / so es empfangen / wahrhaftig / wesentlich / vnd gegenwertig durch die handt des dieners in ihren Munde reiche und gebe / nicht zu Naturlicher speise des Leibes / sondern der Seelen / daß sie dardurch im Glauben gespeiset / und der neue Mensch zum ewigen Leben auffgezogen und gesterckt werde / welcher verstand vnd grundt auß den worten S. Pauli 1. Corin. 10. Ob sie wol von den Sacramentirern in mancherley weise verdrähet vnd verkheret worden seyn / eigentlich zu nemcn ist / da er spricht: Der gesegnete kelch / den wir segnen / ist der nicht die gemeinschaft des bluts Christi: das ist beede die darreichung vnd empfangung oder auftheilung vnd niessung des bluts Christi? Das brot das wir brechen ( auftheilen ) ist das nicht die gemeinschaft des leibs Christi? Es werden auch die gewöhnliche vnd den Alten Lehrern bekandte reden behalten / daß inn / oder vnter oder mit brot vnd wein / der wahre leib vnd das wahre blut gereicht vnd empfangen werdenn.

Dagegen ist an den Sacramentirern höchlich zu straffen / daß sie im gebrauch des Abendmals allein eine geistliche niessung lehren / vnd den Herrn Christum / der zu der rechten Hand Gottes sizet / nicht anderst vñ erden / vnd im abendmal wahrhaftig vnd wesentlich wollen seyn lassen / dann allein mit seinen göttlichen himmlischen gütern / gleichwie die Sonne mit ihren Straalen vñ glanz vom himel auf erden scheint vnd krefftig ist / vnd also in keinem wege zu geben / daß der leib vnd blut Christi des Herrn leblich / oder mit dem munde empfangen werde: Sondern sagen / man muß allein mit dem Herzen hinauf in den himel trachten / vnd mit dem glauben vnd geist seines leibs vnd bluts / das ist / der wolthaten / so er vns damit erworben hab / theilhaftig werden. Dann da Christus spricht: Das ist mein leib / Vnd von dem kelch: Trinck alle drauß / dieselbigen wort verkheren vnd verdreen sie mit dem wort Sacramentlich Oder als inn einem Sacrament / das man verstehen vnd haben soll / als neme man allein das zeichen / oder das brot vnd wein / vnd inn keinem wege den Naturlichen vnd wesentlichen leib vnd blut Christi / so am stammen des Creuzes fur vns gegeben vnd vergossen ist.

Ed